

**Veteran Mic Percaya Komposisi Wakil Dalam Kabinet Penuhi Aspirasi Kaum India Bernama**  
**15 May, 2013**

SHAH ALAM, 15 Mei (Bernama) -- Seorang ahli politik veteran MIC hari ini berkata komposisi wakil India dalam pentadbiran kerajaan yang diumumkan Perdana Menteri Datuk Seri Najib Tun Razak dapat memenuhi aspirasi dan permintaan masyarakat India secara lebih efektif.

Tan Sri K. Kumaran percaya barisan kabinet itu bakal memberi nafas baharu kepada masyarakat India dalam membantu meningkatkan kedudukan sosioekonomi mereka di negara ini.

"Kita boleh lihat wakil kaum India dalam pentadbiran kerajaan kali ini meningkat dan saya juga gembira dari segi komposisi wakil MIC dalam kabinet. Saya harap dengan pertambahan wakil India dalam pentadbiran kerajaan, sedikit sebanyak dapat meningkatkan khidmat kepada masyarakat India," katanya ketika dihubungi Bernama.

Pentadbiran kerajaan yang diumumkan Najib hari ini menampilkan enam wakil India -- dua orang menteri dan empat timbalan menteri.

Najib turut memberi kepercayaan kepada dua wakil yang bukan dari MIC, yang membawa perubahan besar terhadap kedudukan sosioekonomi masyarakat India.

Mereka ialah Pengerusi Barisan Bertindak Hak Penganut Hindu (Hindraf) P. Waytha Moorthy sebagai Timbalan Menteri di Jabatan Perdana Menteri, dan Pengerusi Parti Progresif Penduduk (PPP) Pulau Pinang Datuk Loga Bala Mohan, yang akan dilantik senator, sebagai Timbalan Menteri Wilayah Persekutuan.

Mengetuai barisan MIC dalam kabinet ialah Presiden MIC Datuk Seri G. Palanivel yang dilantik Menteri Sumber Asli dan Alam Sekitar, dan timbalannya Datuk Seri Dr S. Subramaniam sebagai Menteri Kesihatan.

Naib Presiden MIC Datuk M. Saravanan dilantik sebagai Timbalan Menteri Belia dan Sukan dan Penyelaras Nasional bagi pergerakan Putera, P. Kamalanathan pula dilantik sebagai Timbalan Menteri Pelajaran II.

Mengulas pelantikan Kamalanathan, Kumaran percaya Kamalanathan dapat memainkan peranan membangunkan sekolah Tamil di negara ini dalam masa lima tahun akan datang.

"Sekarang kita lihat kerajaan telah pun membelanjakan jutaan ringgit untuk sekolah Tamil dan adalah penting untuk melihat hasilnya sama ada peruntukan itu digunakan sepenuhnya untuk tujuan itu," katanya.

Sementara itu, M. Mohana, Presiden Power Malaysia, sebuah badan bukan kerajaan yang mesra Barisan Nasional (BN) berkata portfolio yang diberikan kepada wakil kaum India dalam pentadbiran kerajaan kali ini dapat membantu membangunkan masyarakat India di negara ini.

Beliau berkata BN sebagai parti pemerintah perlu memainkan peranan dengan mendekati serta menjalin hubungan mesra dengan golongan belia untuk melahirkan idea baharu yang dapat membantu program transformasi kerajaan.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=949968>